

1374 Quando Dentes incipiunt prodire, maxime acuti, ab tensione, punetura, laceratione gingivarum nervosarum, sanguinolentarumque, oritur inflammatio, tumor, gangraena, convulsio, alvi fluor viridis, salivatio, febris, mors.

1375. Quae cuncta facile ex eadem causa oriuntur demonstrantur.

1376. Quin sublata irritatione nervorum (1374.) sponte cessant.

1377. Quod fit 1. gingivas emolliendo, refrigerando, leniendo, mollibus, glutinosis antiphlogisticis. 2. saepe atterendo ad corpora dura, glabra. 3. dissecando operae lanceolae.

1378. Convulsiones hinc oriundas minuta Sp. C. C. dosis felix tollit.

### V A R I O L A E.

1379. Quin infantibus frequens, huc referetur, morbus, qui vocatur Variolarum. Cujus quidem adeo accurata Sydenhami descriptio, ut decies legi merenti pauca modo addenda habeam, unde patet & has ad eandem simplicitatem, ut praecedentes morbos, reduci posse, & aliquid in ordine medendi desiderari haec tenuis.

1380. Est ut plurimum Epidemicus, verno

no tempore primo incipiens, aestate cres-  
cens, languens autumno, hyeme sequenti  
fere cedens, vere iterum eodem ordine re-  
diturus. Quo citius in hyeme incipit, eo  
violentior, quo serius, eo mitior, erit ma-  
li natura. Hinc liquet; quo anni tempore  
periculosior.

1381. Occupat omnem aetatem, sexum-  
que, maxime autem pueros, eosque, qui  
hactenus hunc morbum nondum passi sunt,  
quo aetas humida plus dissipavit, solida ma-  
gis coegerit, eo violentior morbus: Hinc  
pueris, mulieribus, mollibus, laxis, faci-  
lior: exercitatis, viris, senibus, pejor.

1382. Malum hoc, licet Epidemicum,  
contagio suscipitur communicato ab homi-  
ne qui prius laboravit: quod primo vide-  
tur aeri inhaerens, pulmonibus, ori, na-  
ribus, oesophago, stomacho, intestinis,  
dari. Adeoque hoc tempore admodum pa-  
rum materiei venenatae habere.

1383. Haec contagiosa materies (1382.)  
humoribus mista statim producit effectus  
quosdam ordine se mutuo excipientes; qui  
sunt: horripulatio; rigor; febris acuta; ca-  
lor ingens, perpetuus; oculorum splen-  
dor, a liquore tenui & calido illapso; Ca-  
pitis, dorsi, artuum, dolor magnus, ma-  
xime circa partes, cordis scrobiculo sub-  
jectis; vomitus, nausea; inquietudo magna;  
stupor;

stupor; somnolentia; atque infantibus insultus Epileptici.

1384. Initio hujus status (1383.) crux venis missus pulcher, saluberrimoque similimus; secundo, tertio, quartove die, jam instar pleuritici & inflammati cernitur, (1384.) eo plus, quo plus duravit, & vehementius fuit, malum.

1385. Durat hic status, pro varietate epidemica, vehementia morbi, temperie aegri, vario tempore: quo diuturnior ex sua natura, eo mitior futurus totus morbus, & contra.

1386. Unde videtur morbus in hoc statu (1380. ad 1386.) esse velocitas liquidorum aucta a stimulo inflammatorio omni sanguini admisto.

1387. Morbus ergo ille, (1386.) affinis omni acuto inflammatorio, difficulter in hoc statu ab eo distinguitur; scientia Epidemic regnantis, (1380.) aegri in hunc morbum proni, (1381) contagii praegressi, (1382) & inde secutorum symptomatum, (1383.) docet quod adsit, & quod secuturae sint papulae ipsae in altero, mox describendo, decursu.

1388. Cognito (1387.) hoc morbi statu, (1380. ad 1387.) indicatio videtur oriri haec primo; ut, stimulo inflammatorio ablato, (1386.) sanetur status praesens,

&amp;

& impediatur ulterior ejus progressus, & proinde caveatur futura suppuratio, gangraena, &c.

1389. Stimulus videtur auferri posse correctione per specifica ita dicta, vel methodo universali antiphlogistica.

1390. Correctio specifica nisi debet invento remedio opposito illi veneno contagioso, quod tam parva mole suscepit reliqua parit, ut effecta (1382. 1383.).

1391. Quale (1390.) inveniri posse, comparatio historiae antidotorum, & indoles hujus mali faciunt sperare; & ad indagandum impellit summa hinc futura humano generi utilitas.

1392. In stibio, & mercurio, ad magnam penetrabilitatem arte deductis, nec tamen salina acrimonia nimium corrosivis, sed bene unitis, ut quaeramus, incitat aliquis horum aliquando successus.

1393. Methodus universalis videtur hic adhiberi posse, & experimentis perfici debere, illa, quae deprehensa est in omni inflammatorio valere, ne inflammatio in pus, gangrenamve, abeat: quum in aliis omnibus succedat, hic nihil repugnet, morbus variolosus saepe sine variolis sit.

1394. Consistet illa (1393.) in his: 1. mitatur cruar, ut (894. No. 1. 890. No. 1. &c.). 2. Clysinatibus, fotibusque, laxatur

tur tota cutis, os, oesophagus, intestina, saepe. 3. potetur multum aquae tenuissime farinosae, acidulae, nitrosae; hauriatur nitrum stibii, vel polychrestus sal, & hydrogala tenue. 4. sit vietus tenuis; aer in pulmones ducendus frigidiusculus; corpus bene tectum, & perspirabile.

1395 Quamvis enim in hoc morbo raro cogitetur de hac indicatione, (1388.) & de hac met odo in primis, (1393. 1394.) easus tamen, ignaro morbi Medico, saepe dedit successus probantes tales artem.

1396. Morbus hic ubi statum primum, quem Contagii voco, absolvit. secundum ingreditur, qui sic se habet: punctis parvis rubris instar morsus pulicaris cutis capitis primo & faciei, mox manuum & brachiorum, dein trunci, & inferiorum, inficitur; mox mitescunt symptomata; (1383) augentur omni hora quoad magnitudinem, & numerum pustulae valde rubescentes, assiduo magis, magisque, elevantur; inflammantur; cutis tenditur; dolor; calor; impedita circulatio; impedita perspiratio; hinc humorum major ad interiora repulsus; febris; anxietas; dyspnoea; dolor fauci; angina; diarrhoea; dysenteria; mictus cruentus; haemoptoe; cutis inter pustulas liberae inflammatio rubra, dolens, calens; quae ubi duraverunt spatio

4, 5, vel 6, dierum, jam absolute suppuratae sunt, & in totidem parva apostemata conversae. Hunc Inflammationis decursum voco, usque in Abscessum; durat pro varietate Epidemici, temperie, magnitudinis, regiminis, vario tempore, plerumque quatuor, aut quinque diebus; ita, ut octavo, ab inchoamento, die suppuratio adsit; crux tum valde inflamatus.

1397. Si morbus contagii ingens, (1383. ad 1386.) pustulae multae, sibi mutuo proximae, ac quasi implicitae, inflammationis omnia signa magna, temperies fali na oleosa, vigor aetatis, vita praegressa lautiſſima, remedia & regimen velocitatem multum augentia, aestas fervidissima fuerint, tum ad finem inflammationis vesiculae lympha rubella distentae adsunt, gangrenosae indolis indices; (427. No. 5.) hinc cutis circulationi, & exhalationi impeta; inde humorum in interiora repulsas; inde salivatio ingens; tumor magnus manuum, pedumque.

1398. Ex his diagnosis & prognosiſ secundi status cognoscitur, ratioque morbi, & omnium symptomatum in eo capitur, his fere regulis circumscripta:

Quo mitior status contagii, eo lenior status inflammationis.

Quo lentius erumpunt pustulae, quoque proin

proin diuturnior status contagii, eo morbus levior.

**Quo** pauciores, magis separatae, majores, plus a facie remotae, candidiores, & dein flavae magis pustulae, quoque tardius procedunt, eo meliores.

**Quo** plures, magis intricatae, minores singulae, magis in facie haerentes, fuscae, nigraeve, citiusque incedunt, eo pejores.

**Quo** materies pustularum pus magis blandum & perfectum refert, eo melius.

**Quo** materies pustularum ichorem gangrenosum plus refert, eo pejus.

**Quo** spatum inter pustulas magis rubet, calet, tenditur, tumet, circa tempus abscessus, eo melior spes, ob circulationem hic remanentem.

**Quo** idem plus pallet, vel fuscum evadit, eo pejus; angina sequitur lethalis, aut peripneumonia; nisi salivatio liquida, vel ingens tumor manuum, pedumve accesserit; ratio est, liquorum hic impedita, hinc ad interiora aucta circulatio.

**Si** in locis inter pustulas liberis maculae purpureae, lethalis gangraena designatur.

**1399.** Indicatio hoc in statu (1396.) est varia pro vario gradu durantis morbi: nam in primo initio apparentis inflammationis externae, videtur requiri cautela, ne verget in suppurationem; de qua jam actum:

(1393.)

(1393. 1394.) aut, si id spernitur, curandum ut minima fiat, procul a capite, & tarda: quod fit 1. victu tenuissimo, putredini resistente: 2. potu, diluente, blando, subacidulo. 3. medicamento antipylico, aperiente, diluente, assiduo magna copia ingestu. 4. balneo pedum bis de die repetito, horum fotu tepido continuo, epispaisticis applicatis ad cava pedum & poplitum. 5. regimine frigidiusculo, maxime admissu puri & frigidi aeris, interim corpore inferiore contra frigus munito. Haec autem statim & ab initio sic applicanda sunt. 6. si nimio impetu fuerit morbus, opiate vespertina quinta conducunt, reliquis simul, ut praescriptum est, actis.

1400. Post toleratum decursum hunc (1396.), sequitur status tertius suppurationis, quo incepta illa crescit & perficitur: in eo pustulae jam purulentae quotidie augentur, dein maturescunt, albescunt, flavent, ac tertio, quartove die hujus decursus, rumpuntur. Tum vero tota pinguitudo & cutis pure scatet mobili, externe aret, locis liberis inflammatur; hinc impedimento perspirationis, circulationisque, irritatione generis membranosi & nervosi, absorptu puris in venas, fit febris pessimae indolis, cum pessimis symptomatibus; si materies haec purulenta sanguini mista diu *Aphor.* Z move-

movetur, putrescit (82. 100. 406); hinc pro vario delapsu in diversas corporis partes diros effectus, vixque superabiles producit; deliria; phrenitides; anginas; peripneumonias; pleuritides; vomitus; dysenterias; hepatidem; apostemata; anthraces; juncturarum tumores, abscessus, immobilitates; tabem; phthisin; & infinita similia.

1401. Si vero tum **materies** tenuior, acrior, morbusque vehementior, exeditur cutis, pinguitudo, & caro; fiente lata, pessima, ad ossa saepe penetrantia, ulcera coethe; cicatrices foedae.

1402. In hoc statu (1400.) curandus puris ad exteriora exitus, ab interioribus expulsio; quod fit laxando cutim fomentis laxantibus tepidis, assiduo & laborese renovatis; ablutione & gargarismo oris. fauciunque, assiduo; potu largo, calido, cardiaco, detergente, aperiente, putredini resistente; clysmate blando, diluente, emolliente, laxante quotidie injecto, diu retento; victu ex jure carnium cum sale & acidis condito; vini meracissimi subinde moderato usu; dato simul, contra enormes impetus, opio.

1403. Si morbus vehementissimus; ichor gangraenosus loco puris; tota fere cutis occupata; facile patet, cur infelicem adeo, imo

imo ineluctabilem, perniciem adferat hic  
morbū: omnium vero clarissime id lique-  
bit ei, qui ex anatomicis norit, ut ex-  
ternam cutim, ita oculos, narium omnes  
membranas, oris omnia velamenta, aspe-  
ram arteriam; bronchia, oesophagum, sto-  
machum, intestina; jecur, lienem, pul-  
mones, obsideri his pustulis: hinc quippe  
dicta intelligit, & videt, quid ad curatio-  
nem requiratur, & an magnitudo mali,  
perditio tot aegrorum, post vulgata auxi-  
lia applicata frustra semper, non excitet  
boni Medici solertiam, ut initio mali in-  
vadentis summa tentet; vulgata quippe  
methodo nullus, nisi sponte, emergit. Pro-  
phylaxis insitiva videtur satiscerta, tutaque.

### MORBI EPIDEMICI.

1404. **N**otandum vero est super omnia,  
morbos haētēnus descriptos flui-  
dorum, licet nomine, signis plerisque &  
aliqua specie eventus iidem apparent in-  
cauto, tamen in indole tecta, phaenome-  
nis non nisi perito observatis, vario tem-  
pore incrementi, status, coctionis, cri-  
fios, effectu, eventu, sanandi methodo  
requisita, saepe immensum differre.

1405. Adeoque require longe aliam ad-  
ministrationem 6. Rerum non naturalium,

Z 2

aliam